

5. november

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa Issittumi nunat tamalaat akornanni unammilleqatigiinnerup annertuneruleriatornerani nukittunerusumik inissisimaqqulluta Nunani avannarlerni killerni assartuinnermut pilersuinnermullu tunngasuni ungasinnerusiq isigalugu ataatsimut anguniagaqarsinaneremut periarfissat nalilersorlugit misissueqqissaarnermik suliaqaqullugit.

(Nunat Avannarliit Killiit Siunnersuisoqatigiiffiannut aallartitat siulittaasuat Lars Emil Johansen)

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut assartuinnermut pilersuinnermullu tunngatillugu misissueqqissaarnissamik suliaqquasinnermik kaammattuutaat Siumumiit imaattumik oqaaseqarfigissavarput.

Siumumiit isumaqarpugut nunani avannarlerni killerni susasaqarfiit annertunerpaat ilaat tassaasut assartuineq pilersuinnerlu. Nunanut taakkununga pingasuusunut assartuinnerup pilersuinnerullu pingaaruteqassusiat niuernikkuinnaanngitsoq pinngitsoq Siumumiit isumaqarpugut, inuiaalli nunani taakkunaniittut nunarsuup avannaarsuani inuuffigiuminaasinnaasaqisumi inuussutissatigut avataanniit pilersorneqarsinnaassusiat tassuunakkut tunngavissinneqarsimalluni.

Maannamut assartuinnerkut periutsit nunani taakkunani pingasuusuni qissimigaaraanni nunatut ataasiakkaattut assartuinnerkut pilersuinnerkullu immikkuualulluta ingerlatsivugut, soorlulu aamma ilisimasatsituut nunatsinni kisermaassineq aqutigalugu nunatta assartuussinnerkut pilersuinnerkullu ingerlanneqarnera ilusilerneqarsimalluni.

Siumumiit isumaqarpugut ingerlaatsip taassuma politikkikkut nalilersuiffigineqarnissaa tullinnguut-tariaqartoq, tassami siunissaq eqqarsaatigalugu inuiaqatigiinnut assartuineq pilersuinnerlu akinnerpaaq eqaannerpaarlu kiisalu inuiaqatigiinnut inuussutissarsiornerkut pitsaanerpaamik sunniuteqarsinnaasoq ujartuiffigineqartariaqarmat.

Nunarput, Savalimmiut kiisalu Islandi katillugit millionit affaat inorlugit innuttaqarput, taamaattumillu Siumumiit soqutigilluinnarparput nunat taakkua pingasut assartuussinnerup pilersuinnerullu silarsuaanni qanoq ilusilimmik suleqatigiissinnaanerata paasisaqarfigissallugu, taamaaliornikkut aamma nunarsuup avannaata issittullu ukiuni makkunani soqutigineqaleraluttuinnarnerata qanoq assartuussinnerkut pilersuinnerkullu suleqatigiilluni periuseqartoqarsinnaanerani tunngavissiisoqarsinnaaqullugu.

Siumumiit naatsorsuutigaarput siunnersuutip massumap akuersissutiginneratigut assartuussinnermi pilersuinnermilu nunat taakkua pingasut akornanni suleqatigiissutaasinnaasut pitsaasut misissueqqissaarnermit takussutissiarineqalersinnaasut, taamaattumillu siunnersuut tamakkiisumik akuersissutigineqassasoq Siumumiit inassutigaarput.

Anders Olsen
Siumut